

von Wulf Wager

## Führerschei-Neuling



Wo mei große Dochdr da Führerschei' gmacht hot, han i mi scho richtig gfreit, dass i se nemme von dr Disco abhola muaß, ond dass se au amol fährt, wenn i bei ma Feschtle ebbes tronka han. Aber Pfeifadeckl. Wo's drom ganga isch, isch sie en ra andera Disco gwäa, wia de Kloie ond i han wiedr fahra miasa. Ond wenn mir von de Feschter hoim send, no war

se z' miad zom fahra. Mei Rechnung han i scheint's ohne da Wirt gmacht. I han bloß d' Rechnung für da Führerschei' zahla dürfa.

Jetzt send halt alle Hoffnunga auf meiner Zweitgeborana glega. Dui hot ihren Führerschei' mit a paar weniger Stond nobrocht ond deshalb war der au ebbes billiger. Zunäggschd. Nadierlich hot se glei mit alle Autos en dr Familie fahra dürfa, so wia eba alle mit alle Autos fahra dirfat. Mir wär's zwar liabr, jeder het sei oigas Auto, aber des goht aus organisatorische on wega dr persönliche CO2-Bilanz net. So toilat mr ons onsre Autos ond es bleibt emmer offa, wer dui nuia Schramme jeweils ens Auto gfahra hot. Jede von meine drei Frau behauptet jedenfalls, dass sie des sicher net war, weil sie kennt jo Autofahra.

Letscht Woch' isch mei Kloine mit em Ford Ka hoimkomma ond direkt vor d' Hauswand na'gfahra. Se hot gmoint, se häb auskuppelt. Des war aber net so. Ond wo se no d' Kupplong losglassa hot, isch des Auto en Satz noch vorna ghopft ond gega mei nui vollwärmeschutzisolierte Hauswand donnert. Net bloß, das der nuie Putz und dui Isolierung am Arsch warat, noi, au der Ford Ka hot en kompletta Totalschada erlitta, weil 's da Rahma verzoga hot. Wahrscheinlich sott i meine Frau bessr Boxauto kaufa.

Bis näggschd Woch'

Ihr

A handwritten signature in black ink, appearing to read 'Wager', with a long, sweeping underline.

Wulf Wager

Alle Kolumna zom Nochlesa ondr [www.woascht.de](http://www.woascht.de)